

A favur da las scolas medias privatas

Il cussegl grond ha accentuà ses sustegn per la purschida privata da las scolas medias

DAD ANDREAS CADONAU

■ **La debatta davart la finanziaziun da las scolas medias la mesemna passada en il cussegl grond ha inditgà il champ da tensiun per la futura revisiun da lescha per las scolas medias.**

Per il cusseglier guvernativ Martin Jäger èn las variantas discutadas en il cussegl grond la mesemna passada buca gist grevantas. «Susteni l'incumbensa, tge-nina surlasch jau a vus.» Il cussegl grond ha gì da decider da sustener la varianta da l'incumbensa inoltrada dil deputà Heinrich Berther (pcd Cadi) ni la varianta stipulada da la regenza sco resposta. Tractà ha l'incumbensa la finanziaziun da las scolas medias privatas. Il quint 2011 dal chantun Grischun ha resguardà custs per scolars per la scola chantunala da 24 114 francs. Per ils scolars da las scolas medias privatas dentant sulet la summa da 21 645 francs. La differenza sa resulta dals custs d'investiziun a favur da la scola chantunala resguardads en la media dals custs per scolar da quel-

la scola. L'incumbensa da Heinrich Berther pretenda dad era resguardar quels custs a favur dals custs per scolar da las scolas medias privatas. E vinavant da presentar entaifer in onn ina missiva per ina revisiun da la lescha da las scolas medias.

Segirar il terren per la discussiun futura

Plirs votums han pretendì dal cussegl grond dad acceptar l'incumbensa dal deputà da la Cadi en sia furma exacta e da na resguardar la varianta cun las explicaziuns da la regenza. La discussiun e dentant stada plitost da principi a favur da las prestaziuns da las scolas medias privatas en las regiuns e lur valur economica. Puntuà quellas valurs han tant la deputada Elisabeth Mani-Heldstab (pbd Tavau) ed il deputà Duri Bezola (pld Engiadina auta) Insisti sin la varianta da Heindrich Berther han era las deputadas Silvia Casutt (pcd Foppa) e Margrit Darms (pcd Foppa). Tranter auter han ellas pretendì dapli transpa-

renza pertutgant las contribuziuns chantunalas a las scolas medias e menziunà las scolas medias privatas en las regiuns per impurtantas per la plivalur regiunala. A la regenza han divers votums reproschà da buca sa tegnair vi da las pretensiuns dal parlament grischun aresguard las scolas medias privatas. La finfinala è la debatta schizunt sa fatschentada cun singulas formulaziuns da la resposta da la regenza. Da la sfida fundamentala per las scolas medias privatas en las regiuns han ins dentat dudi pac ubain nagut en la debatta parlamentara da la mesemna passada. Per exempel davart il svilup demografic che metta en damonda l'existenza da inquala scola media privata. Il cusseglier guvernativ Martin Jäger ha ditg che la revisiun da la lescha da las scolas medias saja en elavuraziun e vegnia anc quest onn en consultaziun. Sin las debattas proximas d'astgan ins esser spannegiads. En la votaziun ha il cussegl grond preferì claramain la varianta dil deputà Heinrich Berther.



La gronda sfida per las scolas medias privatas resta la demografia.